

太上說九幽拔罪心印妙經

爾時

元始天尊坐七寶殿放大光明徧照三千大千世界觀見衆生受諸苦惱沉淪生死受報无窮於是救苦真人即從座起瞻仰

尊顏長跪問曰是諸衆生以何因緣飄蕩苦海沉沒无邊

天尊告曰如是衆生受諸惡業皆由自心妄想顛倒不悟无為一切罪根皆從心起天堂快樂自由心生三界沉淪亦從心起心生邪

見妄起貪嗔心生感亂存念非真心懷殺害受諸類身心生詭曲與道无因心生虛寂與道相親重宣此義而說偈曰

大道澄廓 元理幽深 先天而生 運化古今 道无形體 澄澹身心 不貪不怒 不真不溢

是非莫識 表裏意專 身心清淨 煩惱不侵

无起无滅 冥漠難料 湛然空寂 了心无心

自然合道 衆聖來欽 昇朝金闕 遊覽寥林

七祖解脫 永離幽陰 皆契心印 悟道合真 念念相繼 勿起塵心

是時受苦衆生聞說妙經咸皆解脫衆真作禮悉大歡喜稱揚讚歎依教奉行

太上說九幽拔罪心印妙經 終



正一天師清微弟子 洪百堅 製作

元始天尊說甘露昇天神呪妙經

爾時

元始天尊在西那玉國香林園中七寶蓮華座上與天中神仙說无上真道今入大乘生解脫門離於空見後與天地神仙說五行運

化見應功德小乘妙道盡十方空界今入道域又言有鬼中仙夫鬼中仙者昔於人中行

三千陰功死經太陰不入惡趣變化作用與鬼神等功德力及乃成鬼仙今為說九化鍊陰生屍章今生陽輝上昇九天又說十方九

地之下三塗地獄善惡報應因緣福果无不該備是時法會中有一童子名曰靜明月光

從座而起稽首仰面讚歎華嚴稀有大慈廣為天人說諸法相各令解脫小臣今日得面

聖顏臣有所疑上聞玄造願開金口廣布慈雲適見

天尊說三塗五苦地獄究罪无有休息今見世間衆生與十惡心迷五毒行无邊无量其業无盡惡道盈溢業火熾盛聞諸衆生死入長夜廣被業牽飢渴苦辛煩燥悶絕縱遇清